

Arubianonan ta orguyoso di renobacion y restauracion di nan pais

Benny Dijkhoff ta muestra di esaki

NOS tur orguyoso y contento di nos pais Aruba, y awo cu mas motibo. E renobacion di centro di ciudad, introduccion di servicio di tram y e rescate di nos monumentonan historico, a comberti Oranjestad den un tesoro nacional. Pa bishitantenan el a bira un destino cu nan no por keda sin conoce, mientras cu localnan cada bes mas ta bolbe topa cu e placer di haci compras den caya principal. Y mientras cu algun kier purba tapa solo cu un dede, hopi ta e Arubianonan sumamente orguyoso, manera Benny Dijkhoff, cu ta contento pa bisa esaki mas duro cu e por. "Laga mi bisa bo francamente... no ta ami so, ta henter pueblo di Aruba mester ta contento paso nos ta wak un cambio completo," el a bisa. E ta un habitante di Paradera, pero pa su trabou di construcion, e ta move tur caminda riba e isla. Y dia cu el a topa cu Prome Minister Mike Eman banda di Huisje Hart na Oranjestad, e mester a pone trabou abou un rato pa bin expresa su palabra di pabien y danki na e mandatario pa tur loke e y su Gabinete ta haci pa nos isla. El a bisa: "Henter Aruba mester ta orguyoso. Nos kier Aruba florece pa nos tur bida. Manera creador a bisa, ta laga awa yobe pa husto y no husto. Si tur Gobierno haci manera esaki ta haciendo aworaki, Aruba lo bay dilanti sigur y e ta bayendo tambe." Aunke e

dia dia di nos bida ta laga e transformacion aki bira algo comun, toch e sinti di orguyo ta bin ariba bek cada bes cu un bishitante of un conciudadano ta resalta e hecho cu nos tin un di e islanan mas bunita den Caribe y henter mundo. Manera Sr. Dijkhoff a conta cu e ta bisa hopi biaha "e hendenan cu a muri basta tempo pasa, cu nan mester lanta wak tur e edificionan, nan ta bolbe muri di susto," cu un hari su tras. Loke mas ta hala su atencion ta e restauracion di e torennan y e tram, entre otro. El a conta cu hopi smaak con e ta wak e tram ta core yen di hende ariba abou. El a bisa cu e mes a dal un rond den dje pa test e yela ripara con e hendenan ta gosa e caya asina. Como resultado, segun Benny, "E pueblo ta gosa di e turismo. Esey ta e base economico di Aruba y e ta floreciendo." Y ta cu bo no mester ta un persona diploma of un funcion halto pa bo ripara cu cosnan bon ta pasando. "Nos tur ta weita con a haci un renobacion completo. Ora cu e turista yega e ta bisa: Caramba, e luga aki ta luga antiguo y nan ta cuid'e!" Benny a

bisa. E ta masha contento di tur e monumentonan historico cu Gabinete Mike Eman a rescata for di nan ruina, pero pio ainda, e negligencia. E ta duna Bestuurskantor como un ehempel di esaki. "E tabata casi pa basha abou y nan a renob'e y traha un edificio luhoso banda di dje," Dijkhoff a expresa. Pa futuro, Sr. Venancio kier wak pa e bon trabou continua. "Nostá sigur cu e luga aki ta bay florece, el a bisa. E ta consciente cu e trabou no a caba ainda, pero e tin confianza cu e futuro ta musta prometedor si ta sigui den e direccion aki. "Percura cu tur hende ta contento, grandi y chikito... cu tur hende ta topa y ta cuminda," y esaki ta hustamente loke Gabinete Mike Eman ta trahando riba dje. Banda di haci di nos isla un luga di cinco strea den su infraestructura, tambe ta enfoca hopi riba e proyectonan cu ta laga nos bin mas cerca di otro manera un comunidad sano. Prome Minister Mike Eman a gradici Benny pa su palabranan y a reanuda su compromiso

cu ne y henter pueblo, cu e ta bay sigui traha incansablemente pa hiba Aruba dilanti.

